

那文毅公奏議

那文毅公初任直隸總督奏議目錄

卷三十六

恭謝

天恩

卷三十七

善後餘事

卷三十八

飭緝逆黨

附稽查保甲

卷三十九

飭緝逆黨

卷四十

飭緝逆黨

卷四十一

飭緝逆黨

附請改發邪教從犯

卷四十二

飭緝逆黨

卷四十三

畿封扈

蹕

籌畫喚咭喇夷使入都章程

卷四十四

懇恤民瘼

調劑鼓鑄

懇准商場出租

請借運本

恭報雨雪

卷四十五

經營漕政

卷四十六

興復義倉

籌補常平

因時改隸

卷四十七

宣防疏濬

卷四十八

分讞諸獄

卷四十九

分讞諸獄

卷五十

訓練武備

籌議換防

議覆裁兵

勅察馬政

卷五十一

推薦賢能

議改定告病人員題咨出缺日期

卷五十二

糾彈庸劣

清釐交代

陳明度支

請餉充費

因事獲咎

那文毅公初任直隸總督奏議卷三十六目錄

卷三十六

恭謝

天恩

邠文毅公初任直隸總督奏議卷三十六

男容安恭輯

恭謝

天恩

嘉慶十九年二月二十四日

奏爲恭報接印日期叩謝

天恩事竊

臣世沐

恩慈久叨

豢養近復

畀以軍旅重任仰賴

皇上洪福天威徵倖得以歲事方愧未能報稱疊荷

溫諭褒嘉

鴻施優渥此次回京恭覆

恩命觀

天顏之溫霽聆

聖訓之周詳復蒙

推恩錫類

澤及先臣凡此

榮寵之優加實屬夢想所不到撫躬循省感悚難名

陛辭後出都於二十三日馳抵保定省城卽於二十四日

准署督臣章煦將直隸總督關防並

王命旂牌文籍等項移交前來臣當卽望

闕叩頭祇領任事伏念直隸事繁難治甲於他省況當
積歉之餘又值地方甫經安定一切整頓撫綏尤
爲不易臣識淺才微深懼弗克勝任惟有時時勉
之以勤事事行之以實仰求

皇上

俯加

教訓庶諸事得有把握藉免愆尤現將一應事宜詳細查
明次第辦理謹

奏奉

硃批清慎勤三字汝其勉之自滿自是四字汝其戒之其餘諸務隨時訓誨爲政不在多言惟至誠耳特諭

嘉慶十九年閏二月初九日

奏爲恭謝

天恩事竊臣由提塘官賁到

恩賞

御製甄別賢愚以澄吏治墨刻一分當卽恭設香案望闕叩頭祇領訖欽惟我

皇上治隆義昊

德洽垓埏官方澄秩敘之源億兆

錫莫安之福

傲於有位臣鄰益凜

訓行欽乃攸司宸寓咸臻法度以練達方資昇任無輕棄
夫老成而姑息適以養奸當慎嚴夫大蠹勿存成
見性情宜凜夫偏私通達下情策勵益神其鼓舞
教化肅則人心自靖正道著而邪慝不興

舜傲

堯咨闡

心源於

寶墨春溫秋肅

譜治理於元筌以茲

牖迪振新期於職思無曠

臣

宣風三輔察吏六條誦

訓言而立勉服膺奉

珉刻而倍深警省

鴻詞載繹名言莫喻夫

高深蟻惆多愚匪懈敢忘夫夙夜惟有認真督率實力奉

行期風氣之還淳誌官箴於無忝庶幾小廉大法

上承

撫辰凝績之庥於焉遠格邇安共覩草面洗心之化謹

奏奉

硃批常勉敬勤毋存怠玩察吏安民化民成俗勉之

嘉慶十九年三月二十五日

奏爲凱撤官兵攜帶幼孩臣未能約束稽查懇

恩嚴加懲處事竊臣承准軍機大臣字寄欽奉

上諭上年那彥成攻復滑城生擒逆首其功甚偉朕已錫
爵酬庸優加恩獎惟伊於料理撤兵事宜號令不嚴辦
理殊未周密不及阿桂遠矣前因吉林黑龍江並健銳
火器各營官兵俱有攜帶幼孩降旨飭查先據富俊奏
訊出應行緣坐逆屬二名隨又覆查京營官兵則所帶

幼孩大率皆係良民并有攜帶女孩者甚至領隊大員中竟有每員帶回七八人十餘人不等無怪乎沿途多用車輛況有帶回逆犯家屬之事縱暴殃民莫此爲甚律載官兵擄掠人口若於已附地面擄掠者不分首從皆斬監候內地州縣更與新附者不同此係行軍定律並非始自今日那彥成身爲大帥必應先明軍紀當克城之曰首將逆犯族屬查明拘繫核辦再將散出良民招令親屬領回其無人收領者交地方官於普濟育嬰等公所分別收養嚴下軍令禁止擄掠方爲師出以律迨官兵分起凱撤尤當三令五申飭令沿途安靜行走

今官兵將滑城子女紛紛攜帶歸途所過如廣平順德趙州各屬州縣無賊之區亦將良民幼孩任意帶回軍律何在卽或該官兵等途次妄爲邢彥成猶得以鞭長莫及爲解其滑城所帶子女及逆犯家屬邢彥成在營毫無約束尙復何所辭咎著將回兵自滑縣至出山海關一應車馬供應俱不准報銷令邢彥成賠出仍令伊自行議罪具奏京營官兵如此則綠營不問可知邢彥成接奉此旨著卽將直隸上年派兵各營自提鎮以及兵丁逐細詳查毋許一名隱匿查出逆犯家屬以及良民子女其原籍有無親屬可歸者均遵前日諭旨按照

京中所辦章程分別辦理毋得草率遺漏若意存迴護
所辦再不周妥別經查出惟該督是問欽此

臣跪讀之

下忱惶無地伏念

臣

上年恭奉

恩命督師勦辦滑縣匪徒仰賴

皇上睿謨廣運

指示機先

臣

得有秉承軍務始能底定渥荷

恩施稠疊

異數寵頒沐

逾格之

殊榮恒抱慙於非分官兵凱撤之際理應嚴加飭禁令其

沿途安靜行走乃未能料理周密以致吉林黑龍江並健銳火器各營官兵沿途攜帶幼孩甚至有帶回逆犯家屬之事臣失察之咎實無可辭仰蒙聖主鴻慈不加嚴譴

諭令

臣

自行議罪具奏

聖恩高厚感極涕零惟有仰懇

皇上天恩除遵

旨自滑縣至山海關一應車馬供應罰賠外再罰

臣

世職

俵十年仍交部嚴加議處以爲不明軍紀漫無覺察者戒至直隸上年派調出征官兵事竣凱撤沿

途攜帶幼孩亦在所必有臣已欽遵前奉

諭旨分別查辦斷不敢稍任遺漏隱匿致滋罪戾謹

奏

嘉慶十九年三月二十七日奉

上諭那彥成奏於官兵攜帶幼孩未能約束稽查自行議
罪一招那彥成身為統帥於凱撤官兵約束不嚴紛紛
攜帶幼孩本有應得之咎惟念伊平素未諳軍律此次
出征之時朕亦未先行申諭昨兵部議處京營各員均
已加恩從寬辦理那彥成自請交部嚴議之處著加恩
寬免其請罰世職俸十年亦減爲五年所有官兵等自

滑縣至山海關一應車馬供應俱不准報銷罰令賠出
送回各幼孩經過直隸境內所需盤費等項亦一併著
賠以示薄懲

嘉慶十九年五月十五日

奏爲欽奉

訓諭敬述悚惕下忱繕摺覆奏事竊臣欽奉

上諭那彥成奏報二麥約收分數一摺單內首開大興宛
平二縣約收八分一派虛詞全不足據卽此可見悠忽
居心怠玩從事大約無福受恩矣本年畿輔一帶雨澤
稀少麥苗黃萎都城附近田畝朕出入經過留心察看

其收成不過在二三分之間今那彥成竟奏報八分其
不實孰甚以此類推其餘各屬稟報真僞亦豈盡足憑
食爲民天最爲地方重務該督於民生本計漫不經心
若此恐汝用心於無用之地俾晝作夜欲仿福康安之
行爲乎著傳旨申飭所有收成分數單著發還俟各屬
地方二麥刈穫登場後確查實在收成分數再行具奏
若再有虛飾經朕查出必將該督嚴懲不貸欽此

臣跪

讀之下不勝悚惕伏查直隸奏報二麥約收分數
每年將屆成熟之時由各州縣查明全境麥收情
形開單申送藩司彙總具詳核奏本年

畿輔一帶雨澤未能霑足前據藩司素納轉據大興宛
平二縣稟報二麥約收八分維時臣卽覺所報分
數過多接見藩司素納面詢據稱州縣所報約收
分數本係約略計算如奏報約收本係歉薄後因
疊被甘膏轉爲豐稔或約收本屬豐稔後因缺雨
接濟轉成歉收情形原屬不定總應俟刈穫登場
確查收成有無增減核明實收分數另行詳請

題報

臣

檢查歷年案卷確係如此辦理且大興宛平二

縣未報被旱意料約收實有八分又因該二縣近
在京城自必具報順天府尹一體核奏臣一時拘

泥糊塗未經駁查卽據該縣等所報分數開單具奏今蒙

皇上指示都城附近地畝

聖駕出入經過留心察看其收成不過二三分是大興宛平二縣前報約收八分竟係不實臣於此等地方事件並不悉心確查率行具奏實屬咎無可辭理合奏懇

皇上天恩將

臣

交部嚴加議處以示儆戒其大興宛平二

縣因何虛報約收分數

臣

已咨順天府尹確查俟

咨復到日再行奏奏一面仍飭查各屬二麥實在

收成分數另行奏報斷不稍任虛飾至

臣仰沐

鴻慈

簡畀畿封重寄數月以來辦理地方公事正以才識短淺
事務繁劇刻刻謹守實未敢悠忽怠玩今蒙

聖主訓飭

臣

惟有殫竭血誠事事益加勉勵或可稍免愆

尤仰副

教誨成全之至意謹

奏

嘉慶十九年四月初三日

奏

臣

前奏

謁

陵隨扈翊衛官兵一摺欽奉

上諭摺內聲敘署提督文寧兩處皆訛寫文孚文寧文孚與那彥成俱係多年舊識現又同官一省何至將其名字書寫混淆豈陳奏事件那彥成竟未寓目耶卽此可見又涉因循大病矣嗣後當留心檢校毋忽欽此

臣跪

誦之下實深惶悚竊

臣

凡遇陳奏事件均係自行

起稿前件奏摺敘稿時因文寧係屬同官是以於

稿內僅寫文字空寫寧字迨繕清之後

臣

偶因感

冒頭目眩暈當下未能親自檢校更正實屬疎忽

乃一經

聖明披覽錯誤立見伏思

皇上萬幾日理遇事

洞鑒無遺

臣

甫辦一省之事乃錯落至此茲蒙

指示悚愧交深嗣後惟當凜遵

訓諭倍加小心不敢少有巖率至直隸政務之煩甲於他

省

臣

才識庸下又兼人地生疎勉力趨公猶恐不

及更不敢稍涉因循上負

鴻慈自干咎戾謹

奏奉

硃批勉力務實切忌虛浮因循大病直隸爲最若不痛懲
將來愈難調治矣

嘉慶十九年四月初七日

奏爲叩謝

天恩恭摺奏

聞事竊

臣

賁捐差弁回省奉到

恩賞紫金錠一匣當卽跪迎望

闕叩頭祇領伏念

臣

叨蒙

簡畀未報涓埃恒盡職之未能每撫時而增惕茲以天中

令序獲分

內府靈丹伏念我

皇上抱切安黎卽物寓節宣之意

情殷保赤順時徵調劑之宜和菊水以延齡閭閻普慶偕
艾符而辟沴疵厲潛消

典重頒冰

恩逾賜葛

臣

惟有勵茲蒲質益竭葵忱推廣

鴻慈俾三輔咸登

仁壽涵濡

聖澤與億兆共樂恬熙謹

奏奉

硃批七十餘名逆賊一名不獲專務駢體鋪張可謂舍本逐末既工文藻不如做內廷翰林何必戀此重任太不知輕重矣

嘉慶十九年六月初三日

奏永定河石景山南北兩岸加培石土各工前經

臣

奏請動項辦理茲據該道稟報完工

臣

擬於六月初三

日起程前往驗收

臣

出省後所有日行公事飭委

藩司素納代拆代行其由臬司解審之案若俟

臣

回省提訊未免遲延卽令該藩司代爲提審

奏奉

硃批知道了

嘉慶十九年六月初三日

奏_臣具奏通州等處得再欽奉

硃批祝現等逆賊總不就獲汝每次奏摺一字不提是何
居心據實回奏欽此_臣跪誦之下實深惶愧伏查祝現
等犯蓄謀肆逆實爲

國法所不容凡在臣民無不同深切齒急思捕獲以正
刑誅_臣到任之後卽飭各屬激發天良認真躍捕
一面派委文武員弁示以獎勵飭令實力查

屢蒙

諭旨嚴催又經添派幹員分頭偵訪歷次均經奏

聞在案數月以來差派文武大小員弁已有一百八十餘

人乃竟無一名就獲殊切焦急之至

臣

實因犯未

弋獲無以仰慰

聖心故不敢以飭緝虛詞頻頻瀆奏非敢稍存懈怠並再
通飭文武員弁上緊密速訪拏獲謹

奏奉

硃批賊不能獲汝何顏見朕

嘉慶十九年六月初五日軍機大臣字寄奉

上諭那彥成奏永定河石景山南北兩岸加培石土各工

完竣於六月初三日起程前往驗收等語近年直隸總督逢到工防汛之期每就近來京請安召見後再行回省那彥成到任半年飭拏逆案要犯等至今並無一名弋獲伊有何顏見朕據稱數月以來派委文武大小員弁一百八十餘人四出訪緝似屬辦理認真乃廣惠祇係鹽政無地方之責伊所派之人亦必不如那彥成之多昨拏獲李玉麟李玉奉二名雖非最要人犯審明實係次要正犯且卽在直隸界內拏獲那彥成更何辭以自解耶該督現赴工次如此數日內祝現等六犯內能拏獲一名准卽來御園請安倘仍一犯不獲著查工事

竣卽回省城督辦緝捕要務不准前來卽來亦斷不召見也

嘉慶十九年八月十八日奉

旨降戴單眼花翎

奏爲恭謝

天恩事竊臣欽奉

上諭那彥成奏請將查拏逆犯畏蕙遷延之遊擊請旨革職一摺那彥成自抵直隸總督任後於飭拏要犯未經緝獲一名此次訪有祝現踪跡派委遊擊圖勒畢善帶同眼線前往查拏該遊擊遷延觀望以致逆犯聞風他

竄那彥成派委不慎咎無可辭乃僅叅奏圖勒畢善並不自請議處甚屬非是圖勒畢善著革職來京俟逸犯就獲後如訊明實係祝現再治其罪若僅係次要之犯則革職已足蔽辜免其治罪那彥成著革去雙眼花翎仍戴單眼花翎並交部議處將來祝現等六犯悉數拏獲內由直隸員弁拏獲一二名尚可加恩賞還那彥成雙眼花翎若無直隸員弁拏獲者不能邀恩賞還也欽此

臣跪讀之下不勝感悚竊念臣身任封疆緝匪詰奸皆屬專責况祝現等犯蓄謀肆逆罪不容誅更應嚴密查拏迅就駢戮方足以彰

國法而絕根株乃自春間到任至今最要各犯尙無一名弋獲捫心自問慚憤交深日前訪悉祝現在山東境內藏匿當派遊擊圖勒畢善密赴躡捕該遊擊訪得踪跡並不慎速掩捕致被他竄此皆臣派委不慎之故乃臣僅將該遊擊奏請革職並不臣請處分實屬疎忽咎無可寬仰蒙

皇上天恩不加重譴僅革去雙眼花翎仍

賞戴單眼花翎交部議處沐

鴻慈之逾格益悚惕以難安

臣

惟有諄飭地方文武各員

嚴密訪緝各要犯務期必獲稍贖前愆并仰報

高深於萬一謹

奏奉

硃批知道了

嘉慶十九年九月二十九日

賞還雙眼花翎

奏爲恭謝

天恩事竊臣欽奉

上諭章煦奏研訊祖黑子並無窩藏逆犯實係李二戈信貪利捏指一摺此案先經順天府眼目在東省認有祝現馬匹又因李二戈信指稱祖黑子家藏有面生可疑

之人所說情狀與祝現相似那彥成一聞此信卽派遊擊圖勒畢善前往躡拏圖勒畢善至祖家莊後遲延畏憚致令逃逸是以將圖勒畢善革職那彥成派委不慎又不自請議處當經革去雙眼花翎仍戴單眼花翎並交部議處現在順天府眼目所認之馬業經查明係灤州民人家所產輾轉賣給郭浩並非祝現之馬茲又據章煦奏李二戈信因貪圖日給飯錢捏造祖黑子家有窩藏逆匪形跡那彥成聞信派員往拏並無不合所有部議降一級調用之處著無庸議並賞還雙眼花翎圖勒畢善派令拏賊旣到祖家莊地方並不卽日掩捕究

未免畏葸但尙不至草職圖勒畢善著革去花翎降爲
都司仍交直隸差委遇缺補用祖黑子等訊係無辜著
卽釋放郭浩賀應成同馬匹如尙未起解來直卽無庸
起解倘業已在途卽著截留釋放李二戈信貪利妄指
以致拖累無辜所擬枷杖尙屬輕縱李二戈信著改爲
杖一百流三千里先在祖家莊枷號兩個月再行發配
以示懲儆欽此

臣

跪讀之下曷勝感激當卽恭設香案

望

闕叩頭謝

恩竊念

臣蒙

列三策以和仁正衆和者考

三

五

皇上特頒

恩諭

賞還雙眼花翎并免議處沐茲

高厚

鴻慈實夢想所不及

恩施逾格感合全家臣惟有益勵血誠實心整頓地方實

力查拏要犯以期仰報

聖恩於萬一謹

奏奉

硃批覽

嘉慶十九年十一月二十日次子容照蒙

恩擢爲尙茶正頭等侍衛

奏爲恭謝

天恩事竊臣接到家信知次子容照仰蒙

恩命

擢授頭等侍衛當卽恭設香案望

闕叩謝

天恩伏念

臣蒙

恩調補直隸總督自本年春間到任至今幾及一載不但
在逃要犯未能弋獲以致上煩

宸厪

宵旰焦勞卽地方諸大政雖經實力整頓亦尙無起色

臣

受

恩深重時增慙愧茲蒙

聖主不加譴責並

加恩陞授

臣

次子容照爲尙茶正頭等侍衛

臣聞

命之下固已歡欣感激想

臣

母在京目覩次孫容照蒙

恩陞擢換戴三品頂戴更必欣喜感謝老年得此益增福

壽是

臣

一門祖孫父子仰沐

聖恩實屬至優至渥

臣

感激

天恩非祇一事一節亦非一言所可聲敘

臣

惟有益加勉

力認真辦事嚴緝要犯以期稍酬

高厚至容照於漢文尙能麤通而清語弓箭未能精熟

臣

當勸其用心學習不許少有高興勤慎當差仰副

皇上造就成全之至意謹

奏奉

硃批汝非無才奈不奮勉逆賊必應除盡汝總視爲泛常再涉因循不能安居保定矣慎之

嘉慶十九年十二月十四日

奏爲呈繳罰項恭摺具奏事竊照本年三月間臣具奏凱撤官兵攜帶幼孩臣未能約束稽覈請嚴加懲處一摺欽奉

上諭京營各員均已加恩從寬辦理那彥成白請交部嚴議之處著加恩寬免其請罰世職俸十年亦減爲五年所有官兵等自滑縣至出山海關一應車馬供應俱不

准報銷罰令賠出送回各幼孩經過直隸境內所需盤
費等項亦一併著賠以示薄懲欽此臣遵卽轉飭總局
司道將此項官兵車馬供應及送回幼孩盤費等
項於報銷案內剔除在案茲據該司道核明前項
車馬供應盤費臣名下共應賠銀一萬九千五百
九十三兩三錢八釐造冊申報前來伏查本年春
間凱撤官兵臣不能約束以致攜帶幼孩實有應
得之咎乃蒙

皇上天恩不加重譴僅將車馬供應盤費等項罰令賠出
荷

矜原於格外益感愧而難名竊念臣自嘉慶十五年蒙

恩補授陝甘總督歲支養廉銀二萬兩臣平日用度最爲

省儉每年可以節省銀一萬兩內外四年以來共

節省銀四萬餘兩除上年帶赴軍營獎賞官兵并

接家眷盤費又本年進京修理祖墳及收拾住房

償還夙逋用去之外實尙存銀一萬五千兩此項

銀兩雖係臣歷年節省所餘然皆係蒙

恩賞給之廉現在臣既有罰賠之項若不卽行呈繳問心

何以自安今將前項銀一萬五千兩就近交存直

隸藩庫下短之項臣有祖遺坐落易州地三段共

二十六頃二十八畝契價銀四千七百六十五兩
請一併入官核計多餘銀一百七十一兩六錢二
釐亦毋庸找還謹

奏奉

硃批戶部知道

嘉慶十九年十二月十九日

奏爲恭謝

天恩事竊

臣

賁捐差弁回省捧到

欽賞

御書福字並鹿肉

臣

當卽出郊跪迎至署恭設香案望

闕叩頭謝

恩祇領欽惟我

皇上自

天錫福與物皆春肅官常而共戴

恩施念民依而並躋仁壽臣備員畿輔近沐

光榮方懼奉職多愆迺荷

隆施下逮吉祥書宇覩

宸翰之星輝珍異元庖飲

上方之仙品恭捧

御書福字敬謹製額並將

賜到鹿肉分遣司道各官莫不感頌

仁慈同聲懽抃

臣惟有稟承

渥眷益矢冰兢既知味以銜

恩常舉頭而增恐謹

奏奉

硃批素餐尸位奚能受福縱逆養奸難免得咎慎之

嘉慶十九年十二月二十四日

奏爲欽奉

諭旨叩謝

天恩事竊

臣

欽奉

諭旨邪彥成於緝拏要犯一事全不認真亦不遵旨將緝捕情形每次具奏經朕屢降嚴旨訓飭伊本日差人齎遞奏摺乃以查辦保甲一事請緩時日虛詞搪塞可惡已極邪彥成著再嚴行申飭本日吏部奏上議處邪彥成降二級留任已降旨依議因邪彥成此次奏摺玩泄愈甚又改爲降三級留任該督接奉此旨速激發天良整飭捕務冀贖前愆欽此

臣

跪讀之下感激悚惶莫能

言狀竊念

臣屢奉

諭旨飭緝要犯一載以來並無就獲實屬有負

委任又不將緝捕情形隨時具奏咎更難追仰荷

聖主逾格

鴻慈不加嚴譴仍予降級留任并蒙

俯加訓誨

臣

具有天良惟有痛自愧奮嚴飭文武員弁益

加嚴密訪緝務期弋獲究辦並將緝捕情形於每

次奏事之便繕摺具奏以仰副

皇上教誡曲全之至意謹

奏奉

硃批朕日夜盼雪又盼擒賊無時或釋汝忍漠不關心乎
忘其爲廣庭之孫矣再不勉力西行定矣

嘉慶二十年二月初一日

命革去雙眼花翎

奏爲恭謝

天恩事

臣接閱邸抄欽奉

上諭上年那彥成賀本賁遞遲延不能按期呈進可見那
彥成一應公事漫不經心該督蒞任以來緝捕疎懈逆
案要犯並未報獲一名昨復因朕駐蹕南苑妄行陳奏
添設燈城干預分外而於本任應辦之事種種廢弛無
庸交部議處著拔去花翎以示薄懲該督當知愧知奮
勉圖後効欽此

臣跪讀之下不勝感惕伏查

元旦賀本

臣

於十二月十五日拜發十八日到通政司

投遞以致封印期內不能彙呈

御覽遲延之咎實無可辭且臣蒙

恩調任以來業經一載辦理地方諸務雖心力不敢稍弛
而才識實有未逮奉

旨飭緝軍開最要次要各犯並無一名拏獲以致屢厯
宸衷卽予罷黜亦所應得適蒙

皇上天恩不加嚴譴僅拔去花翎示懲並荷

訓詞肫切

勸勵優加臣惟有殫竭愚忱事事認真辦理時時嚴緝要
犯以冀稍贖前愆仰報

高深於萬一謹

奏奉

硃批汝捫心自問知愧悔否京城五城各處又獲逆犯數名緣坐家口十餘名汝再不上緊實屬無能極矣

嘉慶二十年四月十七日

奏爲恭謝

天恩事竊臣承准軍機字寄嘉慶二十年四月十二日奉

上諭本日吏部將那彥成議以降一級調用又降二級留任已有旨加恩改爲降三級留任矣那彥成之意總欲辭退直隸總督希圖降調改授京職伊旣可侍奉伊母

又可卸緝捕之責朕轉不將伊降調俾得遂其苟安之心那彥成惟當振刷精神將總督任內應辦事件認真經理督率所屬上緊緝拏逆犯毋再因循疲玩自蹈重愆近日朕聞外間議論派出訪拏逆匪員弁因刑部將拏解之犯屢次審虛以致原拏之人獲罪心存畏葸皆立意不復偵緝此說一倡於捕務大有關礙前此懲辦妄拏無辜之人如廖思芳明知山東之劉第五並非直隸馬駒橋謀逆正犯仍以分金爐之語向其恐嚇必令誣認叛逆以遂其邀功之謀實屬有心鍛鍊是以將廖思芳照律治罪此外無心誤拏者並未一概懲辦卽如

甘省拏解之小王二審明實非正犯其原拏之吏曰王
崗訊無教供逼認情事亦卽未治其罪又近日拏獲之
祝秋兒等實係從逆習教之犯卽經刑部審明按律分
別辦理亦非於拏解各犯一概審虛况如張翔之拏獲
馮克善立由知縣超陞知府若果有能將在逃正犯緝
獲者自必立霽殊恩優加獎擢該官吏等有何疑畏而
不奮勉圖効乎著邠彥成亟將此旨密諭所屬文武員
弁令其破除鄙見各發天良上緊設法躡緝以期早獲
逋逃迅除餘孽爲要欽此

臣跪讀之下不勝感悚當卽

望

闕叩頭謝

恩竊思

臣叨蒙

恩命調任畿封年餘以來辦理地方事件以及緝拏要犯
雖不敢稍遺餘力無如竭盡愚誠於各要犯究無
弋獲捫心清夜實無以仰對

聖明前此謹將臣母老私情冒昧陳奏實不敢懇辭總督
之任今蒙

皇上格外天恩不卽罷黜僅

予降三級留任

聖明體恤仍是

垂念臣母老丁單

天恩高厚於臣烏烏私情無微不照荷蒙

聖主嚴切訓諭臣合家頂戴莫可言宣惟有將應辦事件

勉力經理督率屬員上緊緝拏要犯並將此

旨密諭文武員弁俾其破除鄙見各發天良設法躡緝務
期要犯就獲稍贖前愆仰報

聖慈於萬一謹

奏奉

硃批慰朕盡忠慰母盡孝在汝一心切勿錯會

嘉慶二十年七月二十日

奏爲恭謝

天恩事竊

臣

承准軍機大臣字寄欽奉

上諭那彥成奏永定河北七工第十號隄埝被水漫溢趕緊盤做裹頭並自請嚴議一招永定河北七工漫口距前次漫口不遠幸仍循減河故道下注未經旁溢那彥成現在差次趕辦橋道未能兼顧所有自請嚴議之處著加恩寬免其漫口處所業經盤做裹頭那彥成俟瑤亭送駕後卽馳赴工次查勘情形應如何歸併堵築之處妥爲辦理可也欽此

臣

跪讀之下實深感慨竊念

臣

兼管河務理應督飭屬員小心防護務保無虞乃

於前月二十五日北七工第二十四號漫溢之後
甫及半月該工第十號復又漫口三十餘丈雖因
水勢驟長究由防護不善所致臣未能率屬預防
以致半月之間兩次漫溢實屬咎無可追仰蒙
皇上以臣在差次趕辦橋道未能兼顧

特加矜宥

寬免處分沐

逾格之生成實感深於夢寐

臣

惟有益加自勉俟跪送

聖駕後馳赴工次將應如何歸併堵築之處妥爲勘辦以

期仰慰

聖懷於萬一謹

奏奉

硃批知道了

嘉慶二十年七月二十二日

賞還雙眼花翎奉

上諭朕啓鑾前因大雨連日蒞溝密雲等處橋座有衝塌之處特派禧恩蘇爾慎前往會同那彥成督催支搭均於二十日以前一律完整駐蹕南石槽後又因懷柔縣橋座兩處被衝在石槽停蹕以待飭令那彥成親往督辦仍派禧恩蘇爾慎協同辦理於昨日午刻工竣朕策

馬而度橋座均各完固辦理尙屬妥速那彥成著加恩
賞還雙眼花翎禧恩著賞還花翎黃馬褂並各賞給大
卷八絲緞袍料一件蘇爾慎著賞給大卷八絲緞袍褂
料各一件其禧恩帶往之嚮導處章京二員蘇爾慎帶
往之虎鎗營章京二員與那彥成派出搭橋之文職三
員將弁十六員著各賞給小卷五絲緞袍料一件其搭
橋兵丁四百八十名內有泅水工作者五十名著各賞
給一兩重銀鏤一個其餘四百三十名各賞給五錢重
銀鏤一個俱由廣儲司支給

嘉慶二十年七月二十三日

奏爲恭謝

天恩事竊

臣欽奉

上諭以懷柔橋座

臣

協同禧恩等督率趕搭完竣

賞還雙眼花翎並

賞給大卷八絲緞袍料一件拜領之下感悚無地復於
召見時面奉

聖諭因

臣

母年老是以

特旨加恩俾

臣

之母聞

命增歡更加康健延年

聖慈體恤家人父子實不同於恒泛

臣

現已遵

旨專差家人寄知臣母從此益壽延齡真荷

皇上天地父母之恩臣舉家頂感實無涯涘臣惟有殫竭

血誠益矢報効事事倍加實力整頓并督率文武

員弁嚴拏餘孽早淨根株以期仰報

鴻慈於萬一謹

奏奉

硃批知道了

嘉慶二十年八月初十日

奏爲恭謝

天恩事竊臣賫摺并回捧到

欽賞鹿肉當卽出郊跪迎至署叩頭祇領竊思此次恭逢
聖駕巡幸熱河臣既不克扈隨

豹尾稍効馳驅而古北口外橋梁道路因雨水過多復
有衝失又不能親身在彼督率搶搭實深惶悚迺
荷

鴻慈逾格不加譴咎茲又蒙

皇上將御鎗所中鹿隻

賞給

臣

鹿肉一盤欽惟我

皇上時巡講武

秋獮宣威從禽載獲徵卽鹿之祥

大賚優頒沐

殊恩之賜

臣謹將所

賜鹿肉恭捧與

臣

母看視並宣知係

皇上御鎗所中

行幄分羞舉家食德甘旨飫

天廚之脯百祿增長車攻協吉日之良

三驅卜獲

臣

惟有愈勤策勵勉竭駑駘從此愛日循陔常

戴

生成而將母飲

和食

德益殫葵藿以抒誠謹

奏奉

硃批覽

嘉慶二十年九月初八日

奏爲恭謝

天恩事竊

臣

於盧溝橋途次賫摺并回捧到

欽賞鹿肉一盤當卽叩頭祇領欽惟我

皇上與

天合撰法

祖攸行旣

行健以自強爰

習勞而肄武

調弧一發

得鹿旋占

揚盛事於周行載賡鼓瑟

錫仙厨之嘉味飽飫珍餽

臣

奉職多慙素餐滋懼惟有益

勤策勵勉竭駑駘事事實心辦理并督飭文武員

弁嚴拏遺孽早盡根株以期稍酬

高厚鴻慈於萬一謹

奏奉

硃批覽

嘉慶二十年十一月初三日

奏爲叩謝

天恩事竊

臣

前因保奏永定河辦工出力人員內有緣案

降革官七員冒昧奏准捐復欽奉

諭旨罰令

臣

賠繳銀兩交部加等議處十月二十八日奉

旨此次那彥成於保奏永定河工出力人員爲溫承惠所
蒙將緣事降革官七員含混奏請捐復伊等俱曾任銓
部豈不知捐復人員向例俱由部臣摘敘緣事案由開
具清單分別准駁請旨其奉旨准其捐復者始得赴戶

部交納捐項今那彥成於未經具奏之前卽先令該革
員將捐復銀兩繳庫無論此七員內如王奎聚等原犯
案情較重者斷難准其捐復卽悉屬情輕之員亦從無
此政體實屬有意取巧預爲邀准地步跡近專擅部議
照濫舉匪人例加等議以降三級調用本屬咎所應得
姑念一時簡用乏人那彥成著加恩改爲降四級從寬
留任該督當倍加感奮勉圖後効欽此伏念

臣材識謏

庸賦性愚魯不敢稍有纖毫朦混久在

聖明洞鑒之中此次保奏緣案降革官七員未經摘敘原
案係因拘泥向來軍營河工保奏人員均不敘案

是以遺漏聲敘又於甫經派辦之時卽令該革員

將捐復銀兩繳庫亦係因恐延宕工需起見惟事

疎

何須巧辨實心改過爲是

類朦混跡近專擅一經

聖訓逐層指示

臣

夙夜疚心慄懼悚仄萬分惶恐仰荷

皇上逾格天恩不加嚴譴復將例應降調之案

寬收留任沐

鴻慈之曲逮益感愧以難名惟有事事殫竭血誠倍加奮

勉以期仰副

高厚生成於萬一謹

奏奉

硃批些須小工豈軍務可比況此等劣員實不足惜又不諳工作祇藉家兄營幹耳

嘉慶二十年十二月十六日

奏爲恭謝

天恩事竊臣賁摺并回捧到

欽賞

御書福字並鹿肉臣當卽出郊跪迎至署恭設香案望

闕叩頭謝

恩祇領欽惟我

皇上自

天錫福與物皆春肅官常而共戴

恩施念民依而並躋仁壽

臣備員畿輔近沐

光榮方懼奉職多愆迺荷

隆施下逮吉祥書字靚

宸翰之星輝珍異充庖飫

上方之仙品恭捧

御書福字敬謹製額並將

賜到鹿肉分遣司道各官莫不感頌

仁慈同聲懽抃

臣

惟有凜承

渥眷益矢冰兢既知味以銜

恩常舉頭而增恐謹

奏奉

硃批又賜汝萱堂大福俾增福壽汝其勉旃

嘉慶二十年十二月十八日

奏爲恭謝

天恩事竊

臣

於十二月十七日准兵部火票遞到軍機處

封寄

賞匣二件公文一角內開嘉慶二十年十二月十六日奉
上諭那彥成查拏石佛口世習邪教王姓一案辦理甚屬
認真著吏部查明那彥成被議處分共有幾案由軍機

處具奏候朕酌量施恩發去御書福字一個賞那彥成之母並發去鹿肉二盤麕肉二盤褪鹿肉二盤野鷄五隻賞那彥成之母及那彥成祇領度歲以示恩賚欽此

臣當卽恭捧

恩賞傳奉

諭旨告知

臣

母舉家大小歡抃感戴扶同

臣

母恭設香案

望

闕叩頭祇領伏念

臣受

恩深重節經欽奉

聖訓忠孝二字時刻毋忘

臣

夙夜兢惕急思勉策駑駘仰

卷三十一
三
答

天眷俯慰慈親現在查辦王姓傳教一案屢次稟承

指示督率所屬悉心訪訊祇係尋常分內應辦之事迺蒙
皇上天恩

逾格生成飭查

臣處分酌量

施恩並蒙

頒賜上方多珍異品羅列度歲

臣更得榮沐

賞賚佐承甘旨仰

鴻慈之曲逮家人父子備荷

體恤爲臣子者實夢想所不到

臣祇領之下感悚交縈惟

益殫竭血忱時刻凜奉

勉勸忠孝之至誨事事實力實心並上緊督率員弁設法
偵緝要犯務獲以冀仰紓

慈厯稍答

高厚成全於萬一臣感激下忱謹繕摺專差臣子容安頂
詣

宮門呈遞用代合家恭謝

天恩謹

奏奉

殊批忠孝二字刻不可忘勉之毋怠

嘉慶二十一年正月初四日

奏爲瀝陳下情恭乞

天恩事竊

臣世受

聖主生成服官中外

臣受

恩優渥

臣次子容照又復由

乾清門三等侍衛不及二年蒙

恩擢至頭等侍衛前開豫東事例

臣

以大員應爲子弟呈

捐報効是以爲

臣

長子容安由戶部主事加捐員

外郎經部掣籤第六名是

臣

一門父子無不深荷

鴻慈尤應急圖報稱早令

臣

長子當差惟

臣

母年老已近

八旬臣特蒙

簡命畀任直隸總督事務殷繁甲於他省又兼每歲春秋二差及伏汎應駐河上宣防

萬壽慶節元旦年節均應入都展

覲祝賀一年之內在省之日不及半載臣駐省每日地

方事件及緝捕各務案牘連綿不下數百件又復

接見文武各員或閱操兵弁或審斷案件每遇公

事忙迫之時幾至終日不暇問視臣受

恩深重萬不敢以私妨公致以子情之依戀遂至臣職之

怠荒查臣長子容安年二十九歲前經

奏請隨任蒙

恩允准數年來隨侍臣母凡起居一切臣不克分身之時

祇可令其代臣伺候臣母屢蒙

天語垂問疊邀

恩賞感激之下康健雖俱如前而腰足本有舊疾動履不

能自如臣長子容安隨任多年今以加捐員外郎

例應歸部銓選一經選到卽應當差臣母偏愛此

孫不忍使之遠離又恐悞其差使每一言及情覺

兩難臣顧此情景五內焦急又思容安例應銓選

之人何敢妄行瀆請但臣公務紛繁不能隨時侍

奉_臣母若再令容安遠離_臣母益增寂寞_臣亦實不能放心惟有懇求

皇上格外恩施

勅部將容安暫行停選仍令隨任容安曾經鄉試_臣仍時勛其讀書射箭不許曠閒以圖入場上進_臣更可專心辦事_臣不得已之下情是否可行出自

聖主恩施謹

奏

嘉慶二十一年正月初六日奉

上諭那彥成奏伊長子容安加捐員外郎懇請暫行停選

隨任奉侍伊母仍令讀書入場上進等語加恩著照所請容安准其暫行停選留於任所侍奉祖母讀書應試該部知道

嘉慶二十一年二月初六日次子容照蒙

恩授奉宸苑卿

嘉慶二十一年二月初九日

奏爲恭謝

天恩事竊

臣

於本月初八日接據

臣

次子容照專差家人

稟稱本月初四日欽奉

恩旨以容照補授奉宸苑卿並蒙

召見訓誨

聖諭周詳臣祇聆之下感激難名當卽恭設香案望

闕叩頭伏念臣世受

天恩至優極渥仰蒙

簡畀封畿重任公事不能辦理裕如逸犯又多未獲方懼

不克上承

恩命夙夜兢惕負疚滋深臣次子容照由三等待衛二年

之內

超擢尙茶正臣因其年輕未經閱歷每諄囑其學習當差

恐多隕越茲復仰荷

皇上逾格鴻慈

簡授奉宸苑卿沐

恩施之曲逮實夢想所難期臣一門父子渥荷

寵榮

賞及子女歡逮祖慈舉家欣抃感悚倍深惟有切囑容照

稟遵

皇上教訓臣

殊批忠孝二字時刻毋忘認真小心勤慎當差臣益更殫

竭血誠事事實力實心不敢稍有因循懈忽以期

仰答

高厚生成於萬一謹

奏奉

硃批覽

嘉慶二十一年三月初九日奉

上諭奏摺題本乃臣下告君之言豈可以市井匪類穢語連形章牘初八日刑部進呈直隸總督邢彥成等具題趙春穢罵邊范氏以致氣忿自盡一本將字典未有之字極村極穢之言連敘二處刑部堂司各官俱未看出依樣葫蘆仍照原題直書甚爲因循失體非尋常錯誤字句者可比著大學士董誥托津尙書蘇楞額吳璥將

具題之邢彥成盛泰及本內列名之堂司各官分別議罪於十二日具奏

嘉慶二十一年三月十四日

奏爲恭謝

天恩事竊

臣

接閱邸抄三月十二日奉

上諭前因刑部議覆直隸總督邢彥成具題趙春穢冒邊范氏以致氣忿自盡本內將極村極穢之言連敘二處有失體制特降旨令董誥等將具題之邢彥成盛泰及本內列名之刑部堂司各官分別議罪茲據董誥等奏請將盛泰革職邢彥成及刑部堂司各官分別降調所

議甚是此案盛泰先將穢語敘入原詳本應照議黜革姑念該臬司現在查辦逆案一時更換乏人盛泰革去花翎加恩改爲革職留任盛泰旣已從寬其原議降三級調用之那彥成著加恩改爲降三級留任欽此伏念各省題本皆係恭呈

御覽之件况我

皇上

明刑矜獄於命案本章尤必細加披閱此實中外臣工之所共知乃臣於趙春穢言邊范氏致令氣忿自縊一本輒將鄉俚穢詞連敘二處實係昏憤糊塗心

神瞽亂一經

聖明指示

臣

萬分慙悚無地自容仰不可對

君父俯不可以對同寅疚悔戰慄實爲

臣

畢生難以自問

一息不敢偶忘之咎仰荷

皇上逾格天恩將應行降調處分

特賜寬改留任沐

矜全之曲逮彌感愧以難名

臣

惟有洗心滌慮益加奮勉

事事殫竭血誠以期仰答

高厚生成於萬一謹

奏奉

硃批知道了

嘉慶二十一年四月初五日三子容恩蒙

恩授藍翎侍衛

嘉慶二十一年四月初八日

奏爲恭謝

天恩事竊臣三子容恩蒙

恩賞給藍翎侍衛敝聞之下感激難名當卽恭設香案望

闕叩頭謝

恩伏念臣滿洲世僕久沐

鴻慈自

簡任畿封於今三載愧涓埃之未効恒悚惕而難安乃荷
皇上天恩於本年二月間

擢授臣次子容照爲奉宸苑卿茲復蒙

恩賞給臣三子容恩藍翎侍衛是臣一門父子兄弟叨被

聖恩至深極厚沐

隆施之稠疊思圖報而愈難臣惟有切囑容恩勤慎當差

學習弓馬小心上進臣益勵血誠事事實心實力

認真辦理不敢稍有因循疎懈以期仰報

高厚生成於萬一謹

奏奉

殊批祝劉二逆確在山東陳預只知研審袁武魁不能拏
獲大逆今已匝月二逆遠颺實深憤懣汝力加振作盡
孝盡忠多差員弁各處密訪如能拏獲立沛重恩廣延
墳園遣官告奠汝其勉之汝其勉之

嘉慶二十一年四月二十二日次子容照奉

旨降爲二等侍衛

嘉慶二十一年四月二十七日

奏爲恭謝

天恩事竊

臣

接閱邸抄四月二十二日奉

上諭本月二十日朕由宮門臨幸圓明園路間有驚逸馬

匹由後跑來經過朕前經綿恩查明四執事太監墜馬致逸已將該太監重責四十板彼時護從之侍衛等均未卽時攔截該侍衛等隨扈行走蹕路所經如有叩關之人及驚逸馬匹俱應嚴肅管轄乃是日但聞御前侍衛乾清門侍衛等一聲喊嚷並無一人將馬匹攔回本應概予懲處因念人數衆多姑從寬免孟住蘇沖阿阿勒罕保容照台保係專派後扈侍衛當經降旨交部嚴議本日兵部議奏請將孟住等俱照溺職例革職實屬咎所應得惟是日隨扈行走之侍衛等既未悉予懲處伊等亦可稍從宥減孟住等五人除俱已退出乾清門

外容照著降爲二等侍衛在大門上行走等因欽此伏

查臣次子容照稚年童子疊蒙

聖恩不數年間擢至奉宸苑卿乃值當後扈侍衛隨扈行走遇有

蹕路驚逸馬匹自後跑來理應向後驅逐立時攔拏乃並未卽時攔截以致逸過

御前懈忽疎玩實非尋常溺職可比臣聞信之下深恨容照年輕無能當差怠玩亟思痛加懲責俾知警愧仰蒙

皇上天恩僅止交部嚴議已屬

逾格寬宥卽照部議革職實係咎無可追復荷

曲賜宥減降爲二等侍衛在大門上行走沐

恩施之再造益感悚以難名臣惟有諄囑容照嗣後務宜

小心學習當差加倍奮勉萬不可稍有絲毫懈惰

以期黽勉報効仰答

高厚鴻慈於萬一謹

奏奉

硃批汝子不甚有出息須當嚴行教導令彼成器緝捕不
可疎懈勉之又勉朕宵旰盼信得卽速奏雨暘時若深
感

天慈西成有望矣

那文毅公初任直隸總督奏議卷三十六